

दिनांक : 02.04.2026

समय : 18.45 बजे

आकाशवाणी जयपुर-अजमेर  
प्रादेशिक समाचार

- प्रधानमंत्री नरेन्द्र मोदी नागरिक केन्द्रित प्रशासनिक मॉडल री ज़रूरत माथे ज़ोर दीनो-कर्मयोगी साधना सप्ताह ने संबोधित कीनो।
- केन्द्र सरकार आतूणी एशिया मांय मौजूदा हालात ने ध्यान राखता थकां 30 जून ताई 40 खास पेट्रोकेमिकल उत्पादां माथे कस्टम ड्यूटी ऊं छूट दीनी।
- राजस्थान हाईकोर्ट प्रदेश मांय ग्राम पंचायत अर निकाय चुनाव टेमसर नी करावण रा मामला मांय राज्य निर्वाचन आयोग रा आला अहलकारां ने अवमानना नोटिस जारी कीना।
- प्रदेश मांय केई ठौड़ां आंधी-बारिश-कठे-कठे ओळा ई पड़्या।

000

प्रधानमंत्री नरेन्द्र मोदी देश री तेजी ऊं बदल रही उम्मीदां पूरी करण सारु कुशल अर जन-केन्द्रित प्रशासनिक मॉडल री ज़रूरत माथे ज़ोर दीनो है। वे कर्मयोगी साधना सप्ताह मांय वीडियो संदेश रे ज़रिए बोल रह्या हा। श्री मोदी मौजूदा राज ने 'नागरिक देवो भवः' रा मंत्र ऊं निर्देशित बताता थकां कह्यो के इण रो मकसद सार्वजनिक सेवा ने बत्ती सक्षम, संवेदनशील अर जन-केन्द्रित बणावणो है।

प्रधानमंत्री कह्यो के किण ई देश री ताकत वां री संस्थावां रा बूता मांय व्हे है अर सरकार वां रा बूता ने मजबूत बणावण माथे खास ध्यान दे रही है।

000

सरकार आतूणी एशिया मांय उपजा हालात रे कारण दुनियाभर मांय काचा तेल री पूर्ति मांय आयी अड़चन बीचे 30 जून ताई खास पेट्रोकेमिकल उत्पादां माथे कस्टम ड्यूटी मांय छूट दीनी है। वित्त मंत्रालय रे मुजब ओ फ़ैसलो घरेलू उद्योगां मांय जरूरी पेट्रोकेमिकल री उपलब्धता तैय करण सारु लियो ज्यो है। मंत्रालय रे मुजब इण ऊं संबंधित हलकां माथे खर्चो कम करण रो दबाव हटेला अर पूर्ति मांय थरता आवेला। मंत्रालय रे मुजब मेथेनॉल, अमोनिया, टोलूइन, स्टाइरीन, डाइक्लोरोमेथेन अर विनाइल क्लोराइड मोनोमर समेत चाळीस चीजां माथे कस्टम ड्यूटी मांय छूट दीरीजी है।

000

केन्द्रीय ऊर्जा मंत्री मनोहर लाल साफ कीनो है के ग्राहकां सारु बिजली रा प्रीपेड स्मार्ट मीटर लगावणो ज़रूरी नी है। वे आज लोकसभा मांय प्रश्नकाल रे दौरान पूरक सवालां रा जवाब मांय आ जाणकारी दीनी। मनोहर लाल कह्यो के प्रीपेड स्मार्ट मीटर लगावण ऊं ग्राहकां सागे राज्यां अर बिजली कंपनियां ने ई फायदो व्हेला।

000

मुख्यमंत्री भजनलाल शर्मा सरकारी परियोजनावां मांय नुवी तकनीक अर डिजिटल मैपिंग ने बधावो देवण रा बारा मांय आज जयपुर मांय अहलकारां सागे खास मीटिंग कीनी। वां रा रेहवास माथे व्ही मीटिंग मांय **भास्कराचार्य राष्ट्रीय अंतरिक्ष अनुप्रयोग और भू-सूचना विज्ञान संस्थान यानी 'बाइसेग-एन'** रे जरिए सरकारी कामकाज मांय अंतरिक्ष तकनीक काम लेवण रा बारा मांय चर्चा करीजी। इण ऊं पैली श्री शर्मा राज्य मांय **'माय भारत पोर्टल'** रे जरिए चलाया जा रह्या कार्यक्रमां री प्रगति रो जायजो लेवण सारू ई अहलकारां सागे मीटिंग कीनी अर जरूरी हुकम दीना।

000

गृह राज्य मंत्री जवाहर सिंह बेढम आज डीग मांय **एक जिला-एक उत्पाद नीति** रा तैत नुवो बणायी ज्यो मार्बल मूर्ति प्रदर्शनी स्थल जनता ने सूप्यो। ई मौके वे कह्यो के इण ऊं वठे रा कारीगरां अर हाथ री कारीगरी ने बधावो देवण रो मंच मिलेला। गृह राज्य मंत्री कह्यो के सरकार होशियार कारीगरां री कारीगरी ने राष्ट्रीय अर अंतर्राष्ट्रीय स्तर माथे ले जावण माथे कोशिश कर रही है।

000

राजस्थान हाईकोर्ट प्रदेश मांय ग्राम पंचायत अर निकाय चुनाव टेमसर नी करावण रा मामला मांय राज्य निर्वाचन आयोग रा आला अहलकारां ने अदालत रो हुकम नी मानण रो अवमानना नोटिस जारी कीनो है। हाईकोर्ट रा कार्यवाहक मुख्य न्यायाधीश न्यायमूर्ति संजीव प्रकाश शर्मा अर जस्टिस शुभा मेहता री खंडपीठ राज्य रा चुनाव आयुक्त राजेश्वर सिंह अर चुनाव विभाग रा सचिव राजेश वर्मा ऊं चार सप्ताह मांय जवाब तलब कीनो है। अदालत पैली वाळा विधायक संयम लोढा री ओर ऊं दायर अवमानना याचिका माथे सुणवाई करता थकां ओ हुकम दीनो। अर्जी मांय दलील दीरीजी के हाईकोर्ट अर सुप्रीमकोर्ट रा साफ हुकम रे बावजूद चुनाव विभाग 15 अप्रैल ताई चुनाव नी करा सक रह्यो है। सुणवाई रे दौरान राज्य सरकार री ओर ऊं महाधिवक्ता राजेन्द्र प्रसाद चुनाव रा काम ऊं जुड्या हालात रो हवालो देता थकां कह्यो के सरकार चुनाव करावण री मियाद आगे बधावण सारू अर्जी दे रही है।

000

प्रदेश मांय काश्तकारां ने खरीफ बुवाई रे दौरान बेहतर खाद मुहैया करावण रा मकसद ऊं 30 अप्रैल ताई गुण नियंत्रण अभियान चलायो जा रह्यो है। कृषि मंत्री डॉ. किरोडी लाल मीणा आ जाणकारी दीनी। वे बतायो के ई अभियान रा तैत खाद वितरण व्यवस्था ने सुव्यवस्थित करी जा रही है अर अनुदानित यूरिया ने खेती-बाड़ी रे अलावा अर कारखाना मांय काम लेवण ने रोकण सारू जांच अर प्रवर्तन कार्यवाही करी जा रही है।

000

उत्तर-पश्चिम रेलवे री ओर ऊं चलायी जा रही गाड़ियां मांय हाल ही पूरा व्हा माली साल मांय साढे 18 करोड़ मुसाफिर सफर कीनो, जो लारला साल रे मुकाबले करीब साढे 5 फीसदी बत्ता है। उत्तर पश्चिम रेलवे रा महाप्रबंधक अमिताभ आज खबरनवीसां सागे बातचीत करता थकां बतायो के एन.डब्ल्यू.आर ने लारला माली साल मांय 8 हजार 622 करोड़ रुपया री आमदनी व्ही जो लारला साल रे मुकाबले साढे 7 फीसदी बत्ती है। श्री अमिताभ बतायो के लारला दो साल मांय कोई एक सौ हाई लेवल टेशन बणायी ज्या अर 50 ऊं बत्ता हाई लेवल टेशन बणावण रो काम चाल रह्यो है।

000

राज्य सरकार रो खनिज विभाग दस हजार करोड़ रुपया री आमदनी रो आंकड़ो पार कर र नुवो कीर्तिमान बणायो है। महकमो ई माली साल मांय 13 फीसदी री रिकॉर्ड बधोतरी सागे 10 हजार 394 करोड़ रुपया ऊं बत्ती आमदनी हासिल कीनी है। अतिरिक्त मुख्य सचिव अपर्णा अरोड़ा बतायो के आरकम लारला साल री तुलना मांय एक हजार 163 करोड़ रुपया बत्ती है। वे बतायो के केवल मार्च

महीना मांय ही एक हजार 506 करोड़ रुपया ऊं बत्ती आमदनी व्ही है, जो हाल ताई रा किण ई महीना री सब ऊं मोटी आमदनी है।

000

भारतीय प्रशासनिक सेवा रा अहलकार संदेश नायक आज जयपुर रा कलेक्टर ओहदा रो कामकाज संभाळ लीनो। खबरनवीसां सागे बातचीत करता थकां श्री नायक कह्यो के सरकार कानी ऊं जनता रा भला सारु चलायी जा रही योजनावां रो फायदो लोगां ताई पूगावण अर साफगोई सागे प्रशासन मुहैया करावण माथे वां रो खास ध्यान रेहवेला।

.....  
सलूंबर रा नुवा ज़िला कलेक्टर मुहम्मद जुनैद पीपी ई आज कामकाज संभाळ लीनो। वे कलेक्ट्रेट रो दौरा कर र व्यवस्थावां रो जायजो लीनो अर अहलकारां ने जरूरी हुकम दीना। श्री जुनैद कह्यो के जनता री परेशानियां तुरत आगी करण अर सरकारी योजनावां रो फायदो हकदार लोगां ताई पूगावण माथे वां रो खास ध्यान रेहवेला।

000

प्रदेश मांय श्रीगंगानगर, जैसलमेर अर हनुमानगढ़ समेत आतूणी राजस्थान रा केई ज़िलां मांय आज आंधी चालण सागे बिरखा व्ही। श्रीगंगानगर ज़िला रा कुछ गांवां मांय ओळा पड़्या। ई मौसमी बदलाव ऊं जनता ने तेज गर्मी ऊं साता मिली पण काश्तकारां री चिन्ता बध गयी। बिरखा ऊं खेतां मांय पाक्योड़ी पण ऊबी साखां अर मंडियां मांय रख्योडा अनाज ने नुकसाण री शंका है। जालौर, पाली अर बाड़मेर मांय ई दोपहरां पाछे जोरदार बायरो बाजण ऊं पारो थोड़ो उतरयो। मौसम केन्द्र जयपुर रा निदेशक राधेश्याम शर्मा बतायो के जैसलमेर, जोधपुर अर बीकानेर संभाग मांय केई ठौड़ां चालीस ऊं पचास किलोमीटर प्रति घंटा री रफतार ऊं बायरो बाज्यो। महकमो आवता कुछ घंटां मांय जोधपुर अर बीकानेर संभाग मांय खास सावचेती राखण री राय दीनी है।

.....  
000